



JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIÁL

## ***Komunikadu imprensa***

***7 Agostu 2013***

### **Tribunál Distritál Baucau kondena tinan 18 ba kazu inestu**

Iha 31 Jullu 2013 Tribunál Distritál Baucau kondena arguidu ne'ebé komete krime violasaun seksuál agravadu hasoru ninia oan tinan 18 iha prizaun.

Tribunál prova katak arguidu prátika violasaun seksuál kontra lezada dala rua iha 28 Novembru 2012 no 26 Dezembru 2012. Krime inestu mak krimé ne'ebé ho natureza violénsia doméstika tanba arguidu mak vítima nia aman rasik no hela hamutuk.

Inestu nu'udar violasaun seksuál ne'ebé grave tebes tanba aktu ne'e aleinde kontra direitu labarik sira nian atu livre husi kualker forma violénsia, aktu ne'e mos afeita sira nia dezvoltamentu fíziku no psikolójiku, prejudika valores sosial umanu iha aspetu hotu-hotu no tuir lolos nunka mais admiti atu akontese iha sosiadade sivilizadu sira hanesan ohin loron.

“Hanesan aman, arguidu iha obrigasaun moral atu proteze nia oan husi kualker forma aktu violénsia hasoru nia oan, infelizmente arguidu kontra nia obrigasaun no hamete rasik nia oan nia futuro,” dehan Luis de Oliveira Sampaio, Direitor Ezekutivu JSMP.

JSMP observa katak krime inestu kontinua aumenta bebeik iha tribunál sira hotu. Antes ne'e, iha 22 Jullu 2013, Tribunál Distritál Díli kondena arguidu kazu inestu ba tinan 16 prizaun. Ne'e hatudu prevelensia inestu ne'ebé kontinua eziste no akontese husi loron ba loron.

“Embora desizaun tribunál ne'e hatudu sentidu progresivu tebes iha aspetu kondensasaun, Estadu iha obrigasaun atu interven liu husi aprosimasaun politika lejislative ne'ebé spesifiku atu hatan ba fenomeno inestu iha Timor Leste. Politika lejislative ne'e tenke involve aprosimasaun multi-sektoral iha área sosial, edukasaun ba prevensaun no kondensasaun apropiadu, tenik Luis de Oliveira Sampaio”, Direitor Ezekutivu JSMP.

“Hanesan JSMP rekomenda ona, tenke iha enkuadramentu legal no protesasaun sosial ne'ebé forte liu atu prevene krime inestu no fó protesasaun ba vítima sira ne'ebé vulneravel.

Ministériu Públiku akuza arguidu kontra artigu 172 Kódigu Penál kona-ba violasaun konjuga mós ho artigu 173 alinea (a) Kódigu Penál kona-ba violasaun seksuál agravadu.

Iha julgamentu, arguidu konfesa ba tribunál katak akuzasaun loos hotu no lezada deklara katak faktu sira ne'e loos.

Kazu ne'e rejista iha Tribunál Distritál Baucau Númeru Prosesu: 97/2013/TDB. Julgamentu prezide husi Juiza Dra. Angela B.Virgilio (Presidente), Dr. Afonso Carmona, Dr. José Goncalves, Dr. Baltazar Ramos representa Ministériu Públiku no arguidu hetan defeza husi Dr. Grigorio de Lima husi Eskritóriu Defensór Públiku.

Ofisiál Justisa ne'ebé toma konta ba prosesu ne'e mak Sr. Virgilio Freitas.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl